



Minister Arthur Dowers: Renobacion di Sint Anna School ta avansando bon

E progreso den e proceso di renobacion di Sint Anna School ta bayendo hopi bon. Esaki Minister di Husticia y Enseñansa, mr. drs. Arthur Dowers, a constata dialuna durante su bishita n'e scol na Noord cu a sufri daño inmenso na 2011 ora cu diferente "downdraft" a afecta scol, casnan y e misa Catolico den e distrito.

E mandatario ta haci bishitanan periodico n'e diferente proyectonan di husticia y enseñansa cu ta bao construccion y renobacion.

Siman pasa Minister Dowers a pasa na Abraham de Veerschool na San Nicolas y dialuna tabata na beurt Dominicus College, De La Salle College y Sint Anna School.

Na Sint Annaschool Minister Dowers a topa cu sr. Feliciano di Departamento di Obra Publico (DOW), kende ta encarga cu supervision di e proyecto. Por a nota durante e Minister su bishita cu trabao tabata andando den tur area di e structuranan existente, como tambe ya e fundeshi a wordo coba y ta wordo prepara p'e construccion di e bañonan nobo.

Minister Dowers a haya un descripcion detaya di e renobacion y a keda satisfecho di wak cu e trabao ta avansando bon.

Sint Anna School tabata riba

e lista di scolnan cu tabatin mester di un renobacion y poco siman prome cu e "downdraft" a tuma lugar, prome cu aña escolar 2011/2012 a habri, Minister Dowers a bishita e scol. E proyecto a wordo acelera ora cu e scol a wordo confronta cu e fenomeno natural cual tabata e causa di destruccion na dos scol na Noord, esta Sint Anna y Washington.

Pa motibo di e estado di e edificionan di Sint Anna School y e impacto duro y directo di e "downdraft", e scol a sufri dañonan hopi grandi.

Ya reparacionnan pa pone e edificionan den un estado cu ta aceptabel y sigur, no tabata posibel sin cu un renobacion completo tuma lugar.

Tanten cu e mucha, maestro y materialnan a haya un lugar alternativo pa enseñansa por sigui manera mester ta, e proceso pa pidi ahuste n'e presupuesto na Parlamento a cuminsa. Cu e aprobacion di Parlamento por a efectua un destaho publico, etc. E trabao di preparacion p'e renobacion a tuma su tempo necesario, pero e renobacion mes ta bayendo segun programa y pa otro aña e distrito di Noord lo sera conoci cu un Sint Anna School bunita y modernisa, cla pa ricibi su muchanan bek.